

**Govor predsjedatelja Izaslanstva Parlamentarne skupštine Bosne i Hercegovine u Parlamentarnoj dimenziji Srednjoeuropske inicijative Lazara Prodanovića na sastanku Parlamentarnog komiteta Parlamentarne dimenzije SEI**

**15. lipanj 2021. (online format)**

"Poštovane kolege,

Dame i gospodo,

Dozvolite mi da se na početku zahvalim Skupštini Crne Gore na uspješnoj organizaciji ovog sastanka.

Tema o kojoj danas razgovaramo još jedanput pokazuje koliki je značaj međusobne komunikacije, posebno u ovakvim okolnostima.

Kada govorimo o ulozi zemalja članica Centralnoevropske inicijative u procesu unapređenja mehanizama jednakosti i solidarnosti u zdravstvenoj zaštiti stanovništva, jasno je da nijedna zemlja pojedinačno ne može da se nosi sa izazovima, prijetnjama i poslasticama Kovida.

Znamo da pandemija predstavlja globalnu epidemiju, pa se i odgovor mora tražiti na globalnom nivou, kroz zajedničku usmjerenost na ograničavanje širenja virusa i podšku zdravstvenim sistemima, posebno onih zemalja koje su teže pogođene virusom.

Dame i gospodo,

Nekoliko je polja na kojima moramo zajednički da djelujemo kako bismo zaštitili zdravlje stanovništva ali i olakšali svakodnevni život u vanrednim okolnostima.

Kao članovi parlamenta, naše napore treba da usmjerimo na donošenje onih zakonskih akata koji bi olakšali probleme testiranja i upotrebe brzih antigenskih testova, uzajamnog priznavanje testova, međusobnih priznavanja potvrda o vakcinaciji,

bezbjedno i slobodno kretanje ljudi i transport roba tokom pandemije, kao i sve druge aktivnosti povezane sa javnozdravstvenim mjerama.

S druge strane, kada govorimo o jednakosti i solidarnosti u zdravstvenoj zaštiti, činjenica je da su se zemlje sa različitim stepenom uspjeha suočile sa tri osnovna problema:

- opterećenost zdravstvenih sistema i zdravstvenih radnika
- nedostupnost vakcina
- nedostupnost neophodne medicinske opreme.

Istovremeno, upravo u tim segmentima se pokazala i spremnost zemalja da jedna drugoj pomognu.

Određene zemlje su pružile usluge, stavile na raspolaganje specijalizovano osoblje i dostavile medicinsku opremu ondje gdje je bila najpotrebnija.

Govoreći o zemljama članicama CEI, Poljska i Rumunija poslale su timove ljekara da pomognu u liječenju pacijenata u bolnicama na sjeveru i jugu Italije, Srbija je ponudila besplatne vakcine svim stanovnicima Bosne i Hercegovine, Češka je poslala zaštitna odijela Španiji i Italiji, Mađarska respiratore Češkoj, a međusobnom saradnjom sprovodila se i repatrijacija ljudi koji su se u vremenu pandemije zatekli u inostranstvu.

Dame i gospodo,

Solidarnost kao moralni pojam označava obvezu zauzimanja čovjeka za čovjeka i predstavlja osnovni etički princip.

U slučaju pandemije, solidarnost predstavlja i racionalni element kojim pomažući i štiteći druge, istovremeno štitimo i sebe.

I zato bih na kraju, i kao parlamentarac i kao ljekar, želio da ukažem na činenicu da nam je pandemija Kovida pokazala da svaka od zemalja pojedinačno, ali u okviru zajedničkog djelovanja, mora već sada da pokrene aktivnosti vezano za jačanje kapaciteta za pružanje pravovremeniog otpora nekim budućim pandemijama". (kraj)